



Nakon hapšenja u akciji "Lištica"

# Devet osumnjičenih pušteno, za petero predložen pritvor

Pritvor predložen za Zlatka Marijanovića, Stanka Čolaka, Miru Kvesića, Gorana Marijanovića i Ljubicu Čolak

Nakon akcije Državne agencije za istrage i zaštitu (SIPA) kodnog naziva "Lištica" radi suzbijanja duhanske mafije, istražitelji su saslušali 14 osumnjičenih, od kojih je devet pušteno na slobodu, dok su Tužilaštvu BiH proslijeđeni Zlatko Marijanović, Stanko Čolak, Miro Kvesić, Goran Marijanović i Ljubicica Čolak, a za koje je zatraženo da im se odredi jednomjesečni pritvor.

## Navedeni razlozi

Pritvor im je predložen zbog postojanja opasnosti od bijega, bojazni da bi osumnjičeni boravkom na slobodi, u nastojanju da ometu i onemoguće vođenje krivičnog postupka protiv njih, uništiti ili sakrili dokaze i tragove važne za krivični postupak te utjecali na svjedoke i saučesnike, kao i da bi boravkom na slobodi mogli počiniti novo krivično djelo ili završiti započeto.

**Procjenjuje se da su pripadnici organizirane kriminalne grupe nezakonitim djelovanjem u periodu od tri mjeseca prodali najmanje 55 tona duhana**

Tužilaštvu BiH i Sudu BiH SIPA će dostaviti odgovarajuće izvještaje o realizaciji naredbi, a aktivnosti u okviru ovog predmeta intenzivno se nastavljaju radi rasvjetljavanja krivičnih djela i

dokumentiranja nezakonitih aktivnosti osumnjičenih osoba.

## Imovinska korist

Podsjećamo da su osumnjičeni uhapšeni zbog sumnje da su počinili krivično djelo organizirani kriminal u vezi s krivičnim djelima nezakoniti promet akciznih proizvoda, nezakonit skladištenje robe, porezna utaja ili prevara i pranje novca.

Procjenjuje se da su pripadnici organizirane kriminalne grupe nezakonitim djelovanjem u periodu od tri mjeseca prodali najmanje 55 tona duhana, čime je budžet Bosne i Hercegovine oštećen za skoro 7.850.000 KM, a pribavljena protu-pravna imovinska korist veća je od 1.200.000 KM, navodi se u saopćenju SIPA-e.

**Ad. ALJIMI**



Duhan koji je zaplijenjen u akciji